

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1113959 24 St
Sarajevo, 14.02.2025. godine

Općinski sud u Sarajevu, stečajni sudija Nebojša Joksimović, u postupku prethodnog ispitivanja prijedloga za otvaranje stečajnog postupka nad dužnikom TEHEL Društvo za konzalting, inženjering, finansiranje, posredovanje, izvoz-uvoz, trgovinu i usluge d.o.o. Sarajevo, ul. Skenderpašina broj 16, Sarajevo, van ročišta dana 14.02.2025. godine donio je:

R J E Š E N J E

Pokreće se prethodni stečajni postupak radi utvrđivanja uslova za otvaranje stečajnog postupka nad imovinom privrednog društva „TEHEL“ Društvo za konzalting, inženjering, finansiranje, posredovanje, izvoz-uvoz, trgovinu i usluge d.o.o. Sarajevo, ul. Skenderpašina broj 16, Sarajevo.

Za privremenog stečajnog upravnika imenuje se Kenan Masleš iz Konjica, ul. Gornje polje bb, Konjic.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlašćenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i uraditi kontrolu poslovanja stečajnog dužnika,
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Sarajevu i na Internet stranici FIA-e, i istaknuto na oglasnoj tabli ovog suda, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Registru Općinskog suda u Sarajevu radi upisa zabilježbe prethodnog postupka u matičnom registarskom broju subjekta upisa broj MBS broj 65-01-0311-12 (stari broj 1-24583).

Obrazloženje

Fadil Spiljak je kao zakonski zastupnik privrednog društva TEHEL Društvo za konzalting, inženjering, finansiranje, posredovanje, izvoz-uvoz, trgovinu i usluge d.o.o. Sarajevo, ul. Skenderpašina broj 16, Sarajevo, dana 26.09.2024. godine podnio ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Na ročištu za saslušanje stečajnog dužnika održanog dana 29.01.2025.. godine, zakonski zastupnik društva Fadil Spiljak izjavio je da je firma naslijedila dugovanja, ogromne kredite i ogromna potraživanja od prethodne uprave, tako da se to nije moglo ni u kom slučaju pokriti, te da je sva imovina prodana putem suda, tj. putem licitacije, gdje su se neki uspjeli namiriti, neke banke nisu. Dalje je istaknuo da su ogromna, milionska dugovanja prema bankama, da su blokirani računi od 2012. godine, dodavši da firma nije dizala kredite i da su svi krediti od ranije podignuti od strane ranije uprave.

Gospodin Spiljak je izjavio je da ne zna da li postoje neka dugovanja prema njima, dodavši da postoji predmet broj: 65 0 Ps 299847 18 Ps 2 gdje je Tehel I tuženi, a tužitelj je KERMAS LIMITED – Djevičanska ostrva, dok je na upit da li ima pokretne i nepokretne imovine, izjavio da nema niti pokretne, niti nepokretne imovine.

Stečajni sudija je, nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju i da je isti dopušten, naložio predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač je dana 31.01.2025.. godine dostavio sudu dokaz o uplati predujmljenih sredstava za finansiranje prethodnog postupka u iznosu od 5.000,00 KM.

Na osnovu priložene dokumentacije i saslušanja predlagača, te zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog stečajnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („*Službene novine F BiH*“, broj 53/2021).

Odluka iz stava 3. ovog rješenja donesena je na osnovu odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, odlučeno je kao u izreci rješenja.

STEČAJNI SUDIJA
Nebojša Joksimović

Pouka o pravnom lijeku: Protiv ovog rješenja nije dozvoljena žalba.